

春秋左氏傳

春秋經傳集解宣上第十

杜氏盡十一年

經元年春王正月公即位

公子遂如齊逆女三月遂

以夫人婦姜至自齊夏季

孫行父如齊晉放其大夫  
胥甲父于衛公會齊侯于  
平州公子遂如齊六月齊  
人取齊西田秋邾子來朝  
楚子鄭人侵陳遂侵宋晉  
趙盾帥師救陳宋公陳侯

衛侯曹伯會晉師于棐林  
伐鄭冬晉趙穿帥師侵崇  
晉人宋人伐鄭  
傳元年春王正月公子遂  
如齊逆女尊君命也三月  
遂以夫人婦姜至自齊尊

夫人也夏季文子如齊納  
賂以請會晉人討不用命  
者放胥甲父于衛而立胥  
克先辛奔齊會于平州以  
定公位東門襄仲如齊拜  
丘六月齊人取濟西之田

爲立公故以賂齊也宋人之弑昭公也晉荀林父以諸侯之師伐宋宋及晉平宋文公受盟于晉又會諸侯于扈將爲魯討齊皆取賂而還鄭穆公曰晉不足

與也遂受盟于楚陳共公  
之卒楚人不礼焉陳靈  
公受盟于晉秋楚子侵陳  
遂侵宋晉趙盾帥師救陳  
宋會于槩林以伐鄭也楚  
為賈救鄭遇于北林囚晉

解楊晉人乃還晉欲求斤  
於秦趙穿曰我侵崇秦急  
崇必救之吾以求斤焉冬  
趙穿侵崇秦弗與斤晉人  
伐鄭以報北林之侵於是  
晉侯侈趙宣子爲政驟諫

而不入故不覲於楚

經二年春王二月壬子宋

華元帥師及鄭公子歸生

帥師戰于大棘宋師敗績

獲宋華元秦師伐晉夏晉

人宋人衛人陳人侵鄭秋

九月乙丑晉趙盾殺其君  
夷皐冬十月乙亥天王崩  
傳二年鄭公子歸生受命  
于楚伐宋宋華元樂呂御  
之二月壬子戰于大棘宋  
師敗績囚華元獲樂呂及

甲車四百六十乘俘二百  
五十人馘百人狂狡輅鄭  
人鄭人入于井倒戟而出  
之獲狂狡君子曰失禮違  
命宜其爲禽也戎昭果毅  
以聽之之謂禮殺敵爲果

殺果爲毅易之戮也將戰  
華元殺羊食士其御羊斟  
不與及戰曰疇昔之羊子  
爲政今日之事我爲政與  
入鄭師故敗君子謂羊斟  
非人也以其私憾敗國殄

民於是刑孰大焉詩所謂  
人之無良者其羊斟之謂  
乎殘民以逞宋人以兵車  
百乘文馬百駟以贖華元  
于鄭半入華元逃歸立于  
門外告而入見叔牂曰子

之馬然也對曰非馬也其  
人也既合而來奔宋圻  
華元爲植巡功圻者謳曰  
睥其目皤其腹弃甲而復  
于思于思弃甲復來使其  
驂乘謂之曰牛則有皮犀

兕尚多弃甲則那役人曰

從其有皮丹漆若何華元

曰去之夫其口衆我寡秦

師伐晉以報崇也遂圍焦

夏晉趙盾救焦遂自陰地

及諸侯之師侵鄭以報大

棘之役楚鬬椒救鄭曰能  
欲諸侯而惡其難乎遂次  
于鄭以待晉師趙盾曰彼  
宗競于楚殆將斃矣姑益  
其疾乃去之晉靈公不君  
厚斂以彫牆從臺上彈人

而觀其辟丸也宰夫胹熊  
蹯不熟殺之寘諸畚使婦  
人載以過朝趙盾士季見  
其手問其故而患之將諫  
士季曰諫而不入則莫之  
繼也會請先不入則子繼